

AVVISU

U littori hà da truvà in quistu librettu una publicazioni di l'Azzioni Tematica Programmata di u C.N.R.S. chì n'aghju prisintatu u prughjettu in u 1984 è chì no' emu ottinutu incu a partecipazioni di Ghjuvanni Chiorboli, di Mattea Giacomo è di Ghjacumu Thiers. Hè certa chè altre persone ùn hanu micca crettu di dispone di u tempu necessariu per spallà ci ; ma ponu sempre turrà quelli chì volenu, chè, in tantu, si sò accoppiati tanti studienti è/o insegnanti.

In stu libru si scontra prima u prughjettu cum'ellu hè statu accetatu da u C.N.R.S. è a somma messa capunanzi ne face una spezia di sintesa. S'ellu porghje l'orientazione generale di u travagliu, ùn ne face micca un vanghjelu. Avemu dighjà allargatu è agghjustatu l'impresa : cusì hè stata arricchita, è n'avemu discorsu in e riunione di travagliu (à l'altura di cinque è tra elle, trè aperte à tutti i partecipanti). Ni feremu un resucontu quand'ellu serà tempu.

I ricerchi chì vo'et'a truvà in quelli altri cuntribuzioni so stati compii o principiati innanzi à - o fora di - questa A.T.P., in parti maiori diretti o avviati da Ghjacumu Thiers. L'A.T.P. si hè incaricata di fà li stampà parchi ella voli aduprà sti « publicazioni capunanzi » di modu à nutrisca a riflessioni annant'à i nostri pinseri. 'Si cuntribuzioni, i femu escia perchi noi cunsidaremu chì a scupertu in 'su rughjonu di pinsamentu hè dialettica, in ella ùn ci hè nienti chì sichi prupostu com'è compiu ; tuttu hè in via per fà si è cio chì si dici hè effettu è causa, à un tempu. L'avemu a sparghja di modu ch'elli faccinu nascia a critica, i discorsi, i provi. Chì a nostra primura hè chì tutti quelli chì volinu bè u corsu dianu una spallata à stu travagliu.

Sgiambatti MARCELLES

Da definisce u corsu a primura di tene contu di i fenomeni d'identità linguistica pare ch'ella abbiu trovata a so sesta teorica d'inseme cù l'A.T.P. 91 1164 diretta da J.B. Marcellesi : « Implicazione teoriche e modalità di u prucessu d'individuazione sociolinguistica corsa ». A' partesi da una tavola d'indicatori di cursità è di tratti regionali stabilita segundu e descrizione ammanite di u corsu è apparagunata cù u discorsu nantu à u corsu ch'elli anu fattu in e so pubblicazione i specialisti o l'amatori, l'inchiesta di terrenu metterà in lume u discorsu di i parlanti in quantu à i tratti individuali di a so lingua. Mettendu à parà i risultati di l'interviste cù a descrizione linguistica è cù u cumpurtamentu epilinguisticu, tandu si puderà insignà nant'à chi base - linguistiche o sociolinguistiche - a cumunutà vole definisce è tramandà a so lingua. Un' hè poca ropa issa manera di fà chi schjarisce di più chè l'altre a situazione di e lingue in periculu, e so resistenze, a pussibilità ch'elle campinu è ch'elle si sviluppinu.

L'A.T.P. C.N.R.S. 91 1164 hà parechji scopi :

- 1) Arrigistrà l'esistenza di u corsu in u listinu di e lingue rumanze ;
- 2) Turnà à pone a quistione di a « cursità linguistica » ;
- 3) Insignà e cunsequenze teoriche di a necessità pratica chì s'impone à i rumanisti di tene contu di u fattu glottopoliticu è di inserisce u corsu in l'inseme pè enumerazione di e lingue rumanze.
- 4) Fà vede, in quantu à u corsu, u ritardu storicu impurtante ch'ellu ci hè trà ciò ch'elli sanu in teuria i linguisti (quì l'impurtanza maiò di i criterii sociostorichi in l'enumerà di e lingue) è ciò ch'elli dicenu è scrivenu ogni ghjornu. In quantu à u listinu di e lingue rumanze issa distanza riguarda e lezziò ch'è no pudemu ritene da a riflessione di Gumperz nant'à a « cumunutà sociolinguistica » è da i studii di Labov quand'ellu definisce a lingua « sistema di variabile ».

L'A.T.P. 91 1164 hà da durà trè anni sparti in sette fase : definizione linguistica di l'indicatori di cursità ; analisi di u discorsu non specializatu nantu à a cursità linguistica ; elaborazione di sequenze-tema orale ; interviste di cursofuni in cinque punti d'inchiesta ; analisi d'isse interviste ; cunfrontu di i risultati è cerca di e cunsequenze pedagogiche.